

Untervazer Burgenverein Untervaz

# Texte zur Dorfgeschichte von Untervaz



2025

## Fasnacht in Untervaz

---

Email: [dorfgeschichte@burgenverein-untervaz.ch](mailto:dorfgeschichte@burgenverein-untervaz.ch). Weitere Texte zur Dorfgeschichte sind im Internet unter <http://www.burgenverein-untervaz.ch/dorfgeschichte> erhältlich. Beilagen der Jahresberichte „Anno Domini“ unter <http://www.burgenverein-untervaz.ch/annodomini>.

## VAZER HÄXA SCHNITZELBÄNK 2025



### Indonesiareis vur Désirée Galliard und ihrer Fründin Chiara

Planig vonera Feriareis  
isch nid immer eifach wie jeda weiss.  
D'Froga tüan dänn meischtens heissa:  
Wie viel darfs choschta, wo gömer hi oder wie wömer reisa?

So frogt au Désirée Galliard ihri Fründin Chiara:  
"Wömer in d'Feria Flüga oder Fahra?"  
"Uf Indonesia" meint druf Chiara,  
"simmer sicher schneller mit Flüge as mit Fahra."

Uns so hockens s'Klota locker an der Bye-Bye-Bar  
bi ei-zwei Drinks oder wohrschindli grad a paar  
der einti süess der ander suhr  
und keine luagt amol uf d'Uhr.

In Feriastimmig stossens ihri Gläser zämme,  
im "Last call" ertönen lut und tütlich ihri Näma,  
au d'Swiss lütat beidna a  
doch meinsch eini vo beidna gängti dra.

Wos ändlich amol hän Zit realisiert  
hän beidi uf zmol dänn recht pressiert  
und ufa da letschti Dücker, sisch kei Witz  
hocken beid uf ihrem Sitz.

Leider häns kei Lehr drus zoge und glauben mir das isch keii Lug  
häns s'Indonesia bim a Inlandflug  
vor luter Drinks dänn nid nu fascht  
der Flüger würkli äacht verpasst.

So händs dän halt mit viel Verdruss  
die ganz Stecki müassa reisa mit Schiff und Bus.  
Statt bequem im Flüger in zwei Stund wie der Blitz  
liden dia Unbelehrbara zwei langi Täg uf herta Sitz.

Der Vorteil vu sonera langa Reis  
isch d'Usnüechterigszit wie jeda weiss.  
Und mit klarem Chopf frogt, d'Désirée dänn Chiara:  
"Ei säg, simmer jetz länger gfloga oder gfahra?"

## Vazer Häxa SCHNITZELBÄNK 2025



### Elmi Fischers Hängerli

Wär kennt's nid au?  
Nochem Usgang hei und uf da Kühlschrank los,  
dr Heiss hunger uf öppis deftiges isch riesagross.

Grad noch z'viel Alkohol,  
tuat eim es was salzigs sehr wohl.

Drum hät sich au dr Elmi Fischer nid gfroget,  
warum ihn nochem Usgang no es Hängerli bloget.

Zaggig isch er in d Chuchi ganga  
und tuat scho sehnsüchtig uf a saftigi,heissi Siedwurst blanga.

Bis dia Wurst heiss isch, gohts no es Viertelstündali,  
in dära Ziit ruabet är uf dr Couch es Ründali.

Ds Wasser sütterlet im Topf vor sich här,  
am Elmi werdend d Augadeckla zuanehmend schwär.

Plötzlich a bissiga Rauch in siner Nasa,  
„herrjesses, wo bini? Öppa inara Traumphasa?“

Nei Elmi, du bisch ipennt  
und dia Wurst isch mittlerwila kohlaschwarz verbrennt.

Hoffentlich häsch vor luter Hunger kei Loch im Maga,  
jetzt muasch halt an dina Reserva knaga!

## Vazer Häxa Schnitzelbänk 2025



### Am Blitz sis Hirschfleischzwüschalager

Sit Stunda hockt im Gallis ufema warma Sitz  
der Fischer Sepp, genannt der Blitz.  
Bi zwei-drei Bierli oder meh,  
tuat ihm uf zmol au nütma weh.

As isch im dänn au einerlei,  
wenn s'bstellta Hirschfleisch glieferat wird dahei.  
Zum Glück isch der Flurin Grieder so kulant  
und lieferat ihm das Fleisch ins Restaurant.

Aber wäga dära Lieferung allei  
mag der Blitz jetz nid grad hei.  
Er rüaft am Nati und seit: "Lua,  
chöntsch mir das bis i go in dina Chüalschrank tua"?

Doch bis der Blitz dänn isch endlich ganga,  
isch nomol recht viel Zit verganga.  
Und wia hets au anderscht chöna sie, hät er dia Täscha  
mit sinem Hirschfleisch glatt vergässa.

Halb so schlimm hät der Blitz sich dänkt  
und a paar Tage spöter wieder ins Gallis gschwenkt.  
Hoi Nati seit der Sepp verstohla  
i chuma hüt nu schnell mis Fleisch go hola.

Erscht jetz lüten au am Mary Gloga  
und rüeft entsetzt: "Bin i a Nogga,  
aber sorry Sepp, jetz ischs passiert,  
dis Hirschfleisch hämer üserna Gäscht serviert"!

## vazer Häxa SCHNITZELBÄNK 2025



### Dünser's Tankmaleur

Am Johreskonzert unterstützt dr Fabio Dünser d Musigsgsellschaft an dr Bar,  
suuft selber au mit, das isch doch klar.

Am nögsta Morga, d Auga gön kum offa,  
«wah, i bin glaub immer no bsoffa.»

Jomera nützt jetzt nüd, denn gschäftlich muass er uf Boston flüga  
schnell im Dorf ga tanka, denn ohni Most würds trüga.

In dr hütiga Ziit chama dr Zapfhahn iklicka und muass nüma dernäbet stoh,  
drum tuat dr Fabio zum telefoniara a paar Schritt vom Auto weg go.

«I muss pressiara, sus chumi ds spot. »  
seit er dr Alex am Droht.

Telefoniara und tanka! A Maa cha bekanntlich nid zwei Sacha glichziitig macha.  
So au dr Fabio. Oh wia beschissa,  
hät mit wegfahra dr Zapfhahn samt am Schluch us dr Tanksüüla grissa.

## VAZER Häxa SCHNITZELBÄNK 2025



### Heidi Nutts Eukalyptusdiebstahl

A guati Mesmeri wo tuat d'Chircha pfläga  
isch für jedi Chirchgmei a grossa Säge.  
S' Heidi Nutt isch rutiniert,  
drum hän die Reformierte si engaschiert.

Mim Heidi häns au stets Gewähr,  
für a hübschi Chircha, will sie hät au Flär.  
Das bruchts denn au, zum d'Chircha schmücka  
drum gseht ma sie öpa am Bluama pflücka.

Sie liebt Pflanza und Blätter aller Arta  
macht au kei Halt vor ema fremda Garta.  
Wia chürzli ufema privata Grundstück in Malans  
pfückt sei Eukalyptus, als wär's Usanz.

Und wo der Eigentümer hät reklamiert  
hät sei sogär no proteschiert:  
"Bitte tünsi mi nid frustriera  
i bruch dank dä zum d'Chircha ziera."

Das lieba Heidi hät würklich glaubt,  
für sona Zweck sei das erlaubt  
und chön sich die Pflanza eifach hola,  
überzügt der vo das sei nid gstola.

Liebs Heidi au mir Hexa gsehn das nid als Grund  
drum bitt dä Maa bi Glägaheit um Entschuldigung.  
Ma chan in fremda Gärtä, das häsch hoffentlich au du begriffa  
au nid für d'Chircha, eifach Eukalyptus schniffa.

## Vazer Häxa SCHNITZELBÄNK 2025



### Martin Adams Fuassballreis uf Dortmund

Dr Rene Weber isch als grossa Borussia Dortmund Fan bekannt,  
drum organisiert er für a Männergruppa Fuassballmatche go luaga in Dütschland.

Dia Reis findet jedes Johr statt  
und isch immer sauglatt.

Nid nur ds Tschutta , au dr Usgang darf nid ds kurz cho,  
so häns in dr nöchi vom Hotel inara Spunta no a Absacker kno!

Zu später Stunde sin alli go pfusa  
ussert dr Martin Adam hät d Hoffnig er findi no es was zum schmusa.  
Am nögsta Morga- ds Bett vom Martin isch no unbenutzt,  
bemerkt sin Zimmerkolleg ganz verdutzt.  
Hät er echt uf ma weicha Busa, chöna pfusa?

Nei, nei dr Martin isch uf ma kalta Boda erwacht,  
Denn er hät uf ma Teppich an dr Reception es Nickerli gmacht.

Und das nid öppa im Hotel vo ihna,  
sondern ima wildfremda dina.

## Vazer Häxa Schnitzelbänk 2025



### Der Robin Hedinger und sini Chatz

Was der Robin Hedinger gära tuat das muasch nid froga  
au er got grüsli gern go jaga.  
Am Morga früha, wenn d'Näbel wicha  
gsehsch na scho der Wald uf schlichta.

Doch leider isch er nid allei  
a Chatz verfolgt na sit dahei.  
Schu längschens wär's am Robin glich,  
s'gängt ändlich hei das blöda Viech.

Doch do derfür hät Chatz kei Bock  
verfolgt na bis zum Nesslastock.  
Trotz flatiara und au chieba,  
glingts im nid dia Chatz s'vertrieba.

Au uf sinem Sitz git Chatz kei Ruha,  
schläkt ihm zärtlich sini Schuha  
und fühlt sich so, as isch kei Chohl,  
ans Robins Sita pudelwohl.

Denn plötzlich erschient ganz noch a Tier,  
der Robin häts schu im Visier  
dua macht dä Gingel lut Miau  
und der Bock seit nu no dankend Tschau.

Der Robin fluacht: "Du dummi Chatz  
heb doch eifach dina Latz!"  
S'nöschta mol, dasch mir dänn glich  
verschüssi di du läschtigs Viech.

Aber Robin, tua doch dia liebi Chatz verschona.  
Mir meinten as tät sich eher lohna,  
du giabsch dinem Schatz a rechta Chuss,  
dänn chämtsch au du wiederamol zum Schuss.

## VAZER HäXA SCHNITZELBÄNK 2025



### Füürwehrisatz für da Pipo

Holza für dia kalta Wintertäg,  
das findet au dr Pipo Simmen zwäg!

d Holzspaltmaschina ds Patnal doba lauft heiss,  
am Pipo lauft dr Schweiss.

D Notstromgruppa stotteret, dr Tank isch läär,  
Benzin nofülla in a heisses Grät, isch eher brekär.

«Ach,» meint dr Pipo,»für was abküahla lo, das bruchts doch nit,  
für so Sacha hät ma als Pensionär kei Ziit.»

Plötzlich a riesa Flagg und d Notstromgruppa brennt liechterlo.  
Do gits nu eis, d Füürwehr muass cho!

Da dü da dü! Ds Dorf in Ufruahr, 3 Füürwehrauto rasend dur Vaz  
Wo brennts, wo isch dä Grossisatz?

D Füürwehr Calanda fahrt mim grossa Gschütz uf,  
hän sich sogar no verfahren und möchtend via Überbach d Patnalerstross duruf.

Doch wo dia Füürwehrlüt itroffa sin am Tatort,  
fehlend ihna d Wort.

Nüd uma vo Füür. Nu a schwachs Räuchli stiegt dära Notstromgruppa empor,  
dr Pipo hät sich gschämt:»Chum i miar däppet vor!»

## Vazer Häxa Schnitzelbänk 2025



### Am Lenz sis Fahnamalör

In jedem Blossmusikverei  
häts nid nu Blöser ganz allei.  
Nei s'vorderscht bruchts a strama Fäger,  
a sogenannta Fahnaträger.

Doch eifach sind die nid zum Finda,  
wär lot sich hüt no gära binda.  
Und immer öfter treit dänn d'Fahne,  
halt eina vu da Veterana.

Au in der Vazermusik isch dia Stell vakant  
ma suacht noch ema alta Musikant.  
Und siehe da - gfunda händs  
an alt Bewährta, s'Fuchsa Lenz.

Stolz treit er dia wehend Fahna genau noch Norm  
in sinera schicka alta Uniform,  
mit putzta Schuha und stifem Huat  
und überal töns: "Hergottsack macht dä das guat."

Als got guat für üsera liebi Sohn,  
bis zur Fronlichamsprozession.  
Der Lenz isch in d'Chircha i marschirt  
und dänn isch Folgendes passiert.

"Tambura, links und rechts um, vorwärts, marsch"  
rüeft der Tamburamajor nochem Fahnamarsch  
und au der Lenz marschirt in einer Ruha  
mit erhobener Fahna am Usgang zua.

Doch plötzlich zugt er grausam zämma,  
chan mit aller Müha der Schmerz verchläma  
und in der Empora steckt, as isch kei Witz  
tief im Holz der Fahnaspitz.

Und s'andera End vur Fahnastaga, ei ei ei,  
schlats am Lenz grad zwüschat Bei,  
der Lenz denkt nu no: "Isch das a Gag  
hoffentlich hani jetz kei Loch im - Tschopa."

## Vazer Häxa SCHNITZELBÄNK 2025



### Hügi und Vögalis Skitag

A Männerskitag uf dr Lenzerheid muass eimol im Johr si,  
drum packend dr Rolf Hug und ds Vögali iari Skiusrüstig i.

Noch a paar Kurva im Schnee, das isch doch klar,  
gohts an d Möst an dr ApresskiBar.

Zu später Stunde sin dia Kerli nid öppa hei,  
nei,nei uf Chur segens no dia zwei.

Anderi Schuah und Wechselkleider händs kei derbi ka,  
aber dr Rolf und dr Ada sind spontan und lönd eifach dSkihuttla a.

Au aso chama no eis schnappa und ds Tanzbei schwinga,  
mit da Skischuah tuats eim au nid so schnell usem Gleichwicht bringa.

Ds Taxi bringt dia zwei Nachtschwärmer irgendwann hei uf Vaz.  
«Pssst lieslig» seit sich dr Rolf, sus wecki mina Schatz.

Blöderwiis kriagt er sini Skischuah nid vo da Füess aweg,  
d Schnalla sin total verboga, isch das a Drägg.

Er stolperet in Keller go Werkzeug suacha,  
und morgset diaSchnalla off mit fluacha.

Noch däm Krampf gönnt er sich es Stümpli vorem Huus.  
Plötzlich fahrt Polizei hära, dr Rolf chunnt nüma drus.

« Guata Obet,bi üs isch a Notruaf inacho,  
do im Raiweg 5, söll's uma a lbruch go!»

«Mini Herra, do chani sie beruhiga und sie chönd au wider go,  
dä verdächtig lbrecher bin nämlich nu i, sowar i do stoh!»